



REPUBLIKA E KOSOVËS / REPUBLIKA KOSOVA

GJYKATA THEMELORE MITROVICË - DEGA E GJYKATËS VUSHTTRRI

Numri i lëndës: 2024:232781

Datë: 18.11.2024

Numri i dokumentit: 06465991

P.nr.227/2024

NË EMËR TË POPULLIT

GJYKATA THEMELORE NË MITROVICË – DEGA NË VUSHTTRRI - Departamenti i Përgjithshëm – Divizioni Penal, gjyqtari i vetëm gjykues Agron Maxhuni, në çështjen penale kundër të pandehurës F.D. nga Mitrovica, për shkak të veprës penale Posedim i paautorizuar i narkotikëve, substancave psikotrope ose analoge nga neni 269 par.2 të KPRK-së, duke vendosur sipas aktakuzës së Prokurorisë Themelore në Mitrovicë - Departamentit të Përgjithshëm PP.II.nr.372/24 e datës 21.08.2024 e plotësuar nga prokurori i shtetit në seancën e shqyrtimit fillestar të mbajtur me datës 14.11.2024, pas mbajtjes së shqyrtimit fillestar të datës 14.11.2024, në praninë e prokurorit të shtetit Shaqir Sedolli dhe të pandehurës F.D., pas shpalljes së aktgjykimit me datë 14.11.2024, me datë 18.11.2024 përpiloi këtë:

A K T G J Y K I M

E PANDEHURA: F.D., nga i ati B., e ëma N., e vajzërisë D., data e lindjes..., në Mitrovicë, ku edhe tani jeton, e pa punë, e pa martuar, e gjendjes së mesme ekonomike, studente në fakultetin “Cactus Education”, me numër personal të identifikimit ... , shqiptar, shtetas i Republikës së Kosovës, më parë e pa gjykuar.

ËSHTË FAJTOR

SEPSE: Me datë 17.02.2024 rreth orës 15:15 minuta në rrugën nacionale “Shote Galica” në Vushtri, me dashje dhe pa autorizim ka poseduar narkotikë, në atë mënyrë që pasi kanë ndaluar zyrtarët policor për kontroll tek e pandehura në xhepin e duksit – bluzës, është gjetur një cigare me substancë narkotike e llojit kanabis (marihuanë) që përmban Tetrahidrokanabinal me peshë neto prej 0.62 gram,

- Me këtë ka kryer veprën penale Posedim i paautorizuar i narkotikëve, substancave psikotrope ose analoge nga neni 269 par.2 të KPRK-së.

Andaj, gjykata konform dispozitave të neneve 4, 7, 17, 21, 38, 39, 40, 43, 69, 70 dhe nenit 269 par.2 të KPRK-së, si dhe nenit 241, 242, 364 dhe 449 të KPPK-së, e

G J Y K O N

TË PANDEHURËS: F.D. i shqipton DËNIM ME GJOBË në shumën prej tetëqind (800€) euro, i cili dënim do të ekzekutohet pas plotfuqishmërisë së këtij aktgjykimi.

Në rast se e pandehura refuzon ose nuk mund të paguajë këtë dënim me gjobë, atëherë ky dënim me gjobë do të shndërrohet në dënim me burg, duke i caktuar të akuzuarit për çdo njëzetë (20) euro të dënimit me gjobë, nga një (1) ditë burgim.

URDHËROHET konfiskimi i përhershëm nga Policia e Kosovës i substancës narkotike e llojit marihuanë me peshë të përgjithshme neto prej 0.62 gram.

DETYROHET i pandehuri që në emër të kompensimit të viktimave të krimit të paguajë shumën prej njëzetë euro (20€), si dhe në emër të paushallit gjyqësor të paguajë shumën prej njëqind euro (100€), të gjitha këto në afat prej 15 ditësh prej ditës së marrjes së formës së prerë të këtij aktgjykimi nën kërcënimin e ekzekutimit të dhunshëm.

## A r s y e t i m

### *Pjesa hyrëse e aktgjykimit të arsyetuar*

Prokuroria Themelore në Mitrovicë – Departamenti i Përgjithshëm ka ngritur aktakuzë PP.II.nr.372/24 e datës 21.08.2024 kundër të pandehurës F.D. nga Mitrovica, për shkak të veprës penale Posedim i paautorizuar i narkotikëve, substancave psikotrope ose analoge nga neni 269 par.2 të KPRK-së.

Prokurori i shtetit në seancën e shqyrtimit fillestar të mbajtur me datë 14.11.2024, pas pajisjes me certifikatën nga evidencat penale e ka plotësuar aktakuzën dhe atë nga neni 269 par.1 në par.2, kjo pasi që e pandehura nuk ka qenë më parë e dënuar për vepra të kësaj natyre.

### *Deklarimi i të pandehurit lidhur me pranimin e fajësisë*

Në seancën e shqyrtimit fillestar të mbajtur më datë 14.11.2024, ku pas leximit të aktakuzës nga ana e prokurorit të shtetit, në kuptim të nenit 241 të KPPK-së, e pandehura F.D. ka deklaruar se e pranon fajësinë në të gjitha pikat e aktakuzës, është penduar thellë për kryerjen e kësaj vepre, dhe i ka premtuar gjykatës që në të ardhmen nuk do e përsërisë më veprën.

### *Pretendimet e palëve gjatë shqyrtimit fillestar*

Prokurori i shtetit lidhur me pranimin e fajësisë nga ana e të pandehurës ka deklaruar se është i pajtimit me pranimin e fajësisë nga ana e të pandehurës pranimi i fajësisë është i vullnetshëm i bazuar në provat materiale si në aktakuzë si dhe i propozon gjykatës që pranimin e fajësisë të e merr si rrethanë lehtësuese, gjatë matjes së dënimit po ashtu të merr parasysh edhe rrethanat rënduese dhe atë faktin se vepra penale nga neni 269 paraqet rrezikshmëri të lartë për shoqërinë.

### *Vlerësimi i Gjykatës lidhur me plotësimin e kushteve për pranimin e fajësisë*

Në shqyrtimin fillestar, gjyqtari i vetëm gjykues pas dëgjimit të palëve, ka marrë aktvendim me të cilin e ka pranuar pranimin e fajësisë nga i pandehuri, ngase ka konstatuar se janë plotësuar të gjitha kushtet ligjore për një gjë të tillë. Në këtë aspekt gjyqtari i vetëm gjykues ka konstatuar se

i pandehuri i ka kuptuar natyrën dhe pasojat e pranimi të fajësisë, se pranimi i fajësisë është bërë vullnetarisht nga i njëjti, se pranimi i fajësisë mbështetet në provat materiale të cilat mbështesin aktakuzën, si: raporti fillestar i incidentit me numër të rastit 2024-BD-153, i datës 17.02.2024, procesverbal i marrjes në pyetje për të dyshuarën F.D., i datës 17.02.2024, raporti i oficerit, i datës 17.02.2024, vërtetimi mbi sekuestrimin e përkohshëm të sendeve, i datës 17.02.2024, një fotografi në të cilën shihet substanca narkotike, raporti i ekspertimit nga AKF-ja, i datës 18.07.2024 si dhe aktakuza nuk përmban asnjë shkelje të qartë ligjore ose gabime faktike.

### *Gjendja faktike e vërtetuar*

Bazuar në të lartcekurat, gjyqtari i vetëm gjykues ka vërtetuar këtë gjendje faktike, se e pandehura ka kryer veprën penale Posedimi i paautorizuar i narkotikëve, substancave psikotrope ose analoge nga neni 269 par.2 të KPRK-së, në kohën, vendin dhe mënyrën e përshkruar si në dispozitiv të këtij aktgjykimi.

Në nenin 269 par.1 të KPRK-së është përcaktuar se formën themelore të veprës penale Posedimi i paautorizuar i narkotikëve, substancave psikotrope ose analoge e kryen “*Kushdo që pa autorizim posedon narkotikë, substanca psikotrope apo analoge, dënohet me gjobë dhe me burgim prej një (1) deri në tre (3) vjet.*”, ndërsa në paragrafin 2 është përcaktuar se “*Kryesi që kryen veprën nga paragrafi 1. i këtij neni për herë të parë dhe i cili posedon më pak se tre (3) gram të substancave narkotike apo substancave psikotropike ose analoge dënohet me gjobë ose me burgim deri në një (1) vit.*”

Andaj, bazuar në të lartcekurat, gjykata ka vendosur që të pandehurën ta shpall fajtor për kryerjen e veprës penale Posedimi i paautorizuar i narkotikëve, substancave psikotrope ose analoge nga neni 269 par.2 të KPRK-së, ngase veprimet e të njëjtit përmbajnë të gjitha tiparet e kësaj vepre penale dhe se për të njëjtat është edhe penalisht përgjegjës.

### *Gjetjet e gjykatës lidhur me llojin dhe lartësinë e dënimit*

Lidhur me llojin dhe lartësinë e dënimit, me rastin e shqiptimit të dënimit ndaj të pandehurit, bazuar në nenin 69 dhe 70 të KPRK-së, duke vlerësuar rrethanat lehtësuese dhe rënduese, kjo gjykatë si rrethana lehtësuese ka vlerësuar pranimin e fajësisë nga ana e të pandehurës, pendimin e saj për kryerjen e veprës penale, premtimin e të njëjtës se në të ardhmen nuk do të përsëris veprën penale, si dhe faktin se e njëjta nuk ka qenë më parë e dënuar me aktgjykim të formës së prerë ndërsa si rrethana rënduese gjykata ka gjetur rrezikshmërinë shoqërore që paraqet kjo vepër penale pasi që këto vepra penale janë në rritje e sipër në territorin ku është kryer kjo vepër.

Sipas bindjes së gjykatës, dënimi me gjobë në shumë prej tetëqind (800€) euro, i cili dënim do të ekzekutohet pas plotfuqishmërisë së këtij aktgjykimit është dënim i drejtë, në harmoni me peshën e veprës penale dhe shkallën e përgjegjësisë së të pandehurës.

Gjykata, duke vlerësuar të gjitha këto rrethana ka gjetur se me këtë dënim të shqiptuar ndaj të pandehurës do të arrihet qëllimi i dënimit nga neni 38 i KPRK-së, i cili konsiston në parandalimin e të njëjtit nga kryerja e veprave tjera penale në të ardhmen dhe të bëjë rehabilitimin e saj, të parandaloj personat e tjerë nga kryerja e veprave penale dhe të shpreh gjykimin shoqëror për veprën penale, ngritjen e moralit dhe forcimin e detyrimit për respektimin e ligjit.

*Arsyet lidhur me konfiskimin, shpenzimet e procedurës dhe kompensimin e viktimave të krimit*

Urdhrin për konfiskimin e substancës narkotike gjykata e ka marrë konform nenit 269 par.3 të KPRK-së ku është përcaktuar se “Substancat narkotike, substancat psikotrope ose substancat analoge konfiskohen.”

Vendimin mbi shpenzimet e procedurës penale gjykata e ka marrë në bazë të nenit 449 par. 2 nën par. 2.6 të KPPK-së.

Vendimin për taksën e kompensimit të viktimave të krimit gjykata e ka marrë në bazë të nenit 36 par 3 pika 3.1 të Ligjit Nr. 08/L-109 për Kompensimin e Viktimave të Krimit.

Andaj, gjykata duke u bazuar në arsyet e lartcekura ka vendosur si në dispozitiv të këtij aktgjykimi.

## GJYKATA THEMELORE NË MITROVICË – DEGA NË VUSHTRRI

Departamenti i Përgjithshëm – Divizioni Penal

P.nr.227/2024, datë 18.11.2024

GJYQTARI

Agron Maxhuni

**KËSHILLË JURIDIKE:** Kundër këtij aktgjykimi palët kanë të drejtë ankese në Gjykatën e Apelit në Kosovë, në afat prej tridhjetë (30) ditësh, llogaritur nga dita e pranimi të aktgjykimit. Ankesa dorëzohet përmes kësaj Gjykate, në kopje të mjaftueshme për palët dhe për gjykatën.